

***** *L'canton de l'Union* *****



L'é vertech l nef Almanach!

En sabeda ai 24 de firé te Sorastanza de la Scola a Sèn Jan vegn endrezà la Radunanza anuala de l'Union di Ladins e prejentà l'Almanach 2017, che ge vegn sport ai sozi e ai aboné fascegn de La Usc

Ence chest an l'Union di ladins de Fascia se endreza a serèr sù l codejel di avenimenc de l'an fenì da pech te sia radunanza anuala, e descheche sozet oramai da 6 egn, apede al bilanz de la sociaziun, tant economic che de l'atività, la porta dant travers l'Almanach 2017 ence n gustégoi e enteressant bilanz di avenimenc più significatives sozedui fora per l'an, con la informaziun metudes ensema da la redazion de La Usc di Ladins e i evenc de maor emportanza vedui con l'èie ironich e l lapisc spiz de Manuel Riz.

Apede ai fac sozedui fora per l'an, ence chesta neva edizion de l'Almanach l'Union, con sie president Fernando Brunel, sporc vigni meis na curta biografia de n personaje ladin che à segnà la storia o la vita de noscia comunanza. Na galaria de retrac che doventa de an en an più rica, e che pel esser de utol per coriouse e interessé, ma ence per la scoles.

Chest'outa la colaborazion con la Scola Ladina de Fascia là è stata dalbon strenta: de gra prum de dut al professor Thomas Zulian, che l'è ence conseier de l'Union, chest Almanach à podù se emprevaler del gran lurier fat dal grop de robotica "Gome neve" sui ucie de nosc raion tel projet "Birdtown".

Vigni meis troon donca n ucel, prejentà con n bel dessegn realisà dal joen grafich Fabian Mosele, che del 2017 se à diplomà al liceo artistich de Fascia, e con l test de la dozenta de sciences del liceo scientifich prof.ra Elisabetta Demattio. Troon adertura l qr code per poder scutèr coche l cianta!

No l'è da desmentier che ence Manuel Riz e Stephanie Ghetta, che fesc dut l lurier de grafica e impaginazion, l'è doi professores de la Scola Ladina de Fascia.

No podea donca esser post mior ches an per endrezèr la radunanza e la prejentazion del nef Almanach che te la Sorastanza de la Scola Ladina de Fascia.

L'apuntament l'è donca a Sèn Jan en sabeda da les 4 domesdi e l sarà viventà ence da la sonèdes de n driz de studenc de la Scola.

La prejentazion é averta a duc, e a chi che à fat o renovà l'abonament a La Usc di Ladins per l'an 2018 o che paa ite l'adejion de sozio a l'Union l'Almanach ge vegn sport debant.

Se pel fèr o renovèr l'abonament o l tesserament ence diretament endèna la radunanza. Siede duc envié de cher.

